

# LDeeP Labberlabor

**duden** // mir sy meh schtei aus eine - meinsch öppe dr einschtein hä? / dä mitem schtei vom feinschte - meinsch dä vo de weise? / hesch e meise - füeusch di aus superstar / aues klar? - bider u mot sy da - am schart / si d' deppe - während mir warte im ziu mitere fette / zigarette mache mir dr deal - mit aune platte / bi üs sugsch dr rouch - im windschatte i / klappere dini chnöi - wi bimne blähsoudat mit batterie / sit i im chindergarte by - gits dert tuusigi / fäns wo wüsse - das mir im duden sy / itze schtuunet dir - aber schlöht mau nache / fingsch mi bim zwöite buechstabe B wi biderma - M wi mot / lade dr chare u fahre dir vor / dr bider isch ds bänzin - u dr mot dr motor / mir lege dr duden wäg mann sie vö afa blettere / we mir gö ga ufnäh - de ghörsches nächer scheppere / ja mir chegge dä - tegscht - redene när - z'letscht / bewege meh ärscher - aus dr cassius clay het / vrsohlet - was cash wettsch? - mir hei drs gschtogle / u figg mi nid aa mit dire plastigpischtole / mann bsorg drs säuber - oder gang ders dert ga hole / wo me zersch e füürmäuder ghört - u när gsesch de chole // **mot u bidermaa lifere da gäbedr das / u widr isch ds mass vou / krass dr flou / si pläm pläm scho ds läbe lang / viu schpass für d'homes mit wiudem überläbensdrang** // bi aus outoor nie didaktisch / i rouche ou aus taktik / du bisch nid schlächt / wiu d'grammatikalisch schwach bisch aber wed nume scheiss machisch / bisch praktisch usem business / du fragsch mi / wär isch es? wär macht is // gwunderig während mir dunge si / schtundelang tummle mir üs über di jahrhundertbeats / und di vrwunderets no s'chunnt nid vo ungefähr / wäg dr uussprach wird mängem d'zunge schwär // s'isch scho stunde här / bi scho lang dinn / plämpläm u so / läng und dünn / s'isch dr wahnsinn und scho lang nümm dusse / ja klar bring i floskle / wahr isch's choschtet u poscht bringts meilewit // wäge mine styles vrgeile d'lüt i briche ds brot wi abraham / aber teile nüt / i seile di ab wi aladin i tuusig u eire nacht / weimer hüt no muusig u bounce nachemne feine z'nacht // lue mir hole di ab / nimm d'chole vom paps / ds sigi gschtole? du lachsch / mir vrpole di sach / mini roue macht krach u aui manne u froue ungerem dach im huus / mir lige flach im groove // mascht u schotbruch lieber e mot zu gascht mit em rote tuech / aus e matador wo sini tote suecht / dr wäg isch wode geisch egau dür wele ort de muesch / fingsch sicher e dealer wede illegali droge bruuchsch // **r** // wort si wi schwärt für eine wo fächte cha / vili vo dene wacke mc's hei gloub e schlächte tag / sie si e rächti plag frag mi nid wär d'rächnig zaut / zeigmr mau dis oug isch vrdächtig schmau // weisch: verschteisch de ds meischte nid de meinschte bruchsch ä feisse duden / müestisch öppis leischte fragsch ä leischt wo de muesch luege / dä seit aber meischtens wede schnurisch söusch de rue gä / när fingsch us guetem grund biudig scheisse / blibsch ä fule // wi dr papa moll blasi bubbles i fasle mit flou u jede vrma das / schade cha mi shit nid lue i haders / mi rap chadrs zrtrenne wine black'n decker / muesch nid renne fürne mic checker // möchtsch gärn das vo lide rede? hä / gimer gschider no ä zigarette u tue di bewege / richtig hingerelige / dini finger die spile nid mit rosehränz / du geisch nid i d'chile aber gloubusch aui grosse sätz // wöu mir si da gäbe dir das wo du hesch wöue ha / scho lang söue ha nid nume sänf u cervelat / i ha näbe mir dr bidrmaa är isch mi ma / mir gäbe dir es hauptgericht ab u nid e bylag // widr uf vinyl duss / fingsch aus stuss ke fun / de schiss druf / i ha ke schluckuf wi dr B.I.G. / bilibeni im groove bini so wini bi bis zur letschte riue ischs ä ritus wo jede mitmues // **r** //

**pläm pläm pläm** // -32h: wär, wie was; dä die das / wiso und überhaupt, seelig wird dä wo's gloubt / jede behauptet und kene beachtet / das jede satz en arsch het me me ne vo hinge betrachtet / wörter si wi zimmer: formal verschachtlet / suechsch ä türe, fingsch höchstens es fänschter / dinne chiflet d'frou und dusse warte d'gangschter / u när ou, wenn den uusbrichsch us dim bou / stecksch bald bis zum rumpf im sumpf anschtatt im früsche morgetou / töif sinierend umezflaniere und gedicht us em vorletschte jahrhundert ds zitiere / dr köter uf aune viere schpöit uf biokosma und psychos mit karma / die wei doch aui koks ha und psychofarmaka / u när aui zäme sech nume dümmleach aagrinsch / dä schit chunt uf di zrüg in zins u zinseszins / zausch ewig ab anschtatt irgend e sinn z'finde / vrharzt u vrschnorzt wie boumrinde / bi lieber pläm pläm bim jam ir LDeeP disco / u weds nid verschteisch de bisch nid mitchoo // **hie simer wär het ds biis i de finger / lue mal hey / ldeep schteit derhinger / wär usegeit blib doch dinne für immer / wär usegeit het vom blasse ke schimmer** // urs pop: funk du nume de halbstarcken i bi d viecher u gliichziitig d arche / astrachan oder es hemmli us barchert / egal i bi dä wo nid schnarchet / reden isch arbet u weder de darbet de gibenech wort / während de schlafsch de tribeni schport / chas nid gseh wi dini

bibe verdorrt / reisen un i bliben em ort wi der blind ma / der martial arts master faht mit em gring aa / was es ching cha das chani de ou / i ring gang i mit stamina voll / shaoling-yang, numen em bare money vertroui / u flowe wine bäremani so hohl / us vollem hahne gani ids gool / i mim name hani kes V / aber voll dänen u pläm / drum nämet die häng u lööt sen id luft loos / mir si uf em cover druff gross / vom heftli vor aaschtalt / d helfti isch aagschnallt u d helfti fallt frei / wüll mer ke gschtalt hei blibe mer im schaltkreis / wirts der bald z heiss bruuchsch es hüetli de falt halt eis // **r** // tschou zäme / mir si da für euch d show ds schtähle / luegen umen um e frou z wähle / voll däne / d hiphop hippies uf em trip is nächscte millenium / no als gritties chlaue mir der schtärn vom benz / jede kennts / ldeep isch wach und fit / aber bärn verpennts / mir verblasen ou dini boxe / fingschs zum chotze / yo yo mir rouke / immer no underdogs / potz blitz / mot bider und pop / und der böse hund / gschider hip hop / als e schiben im chopf / während mir am schart sii / lige si no / du bisch artig? mir digge der flow / wart hie / fahrts der ii? sigis eso / dichter i töpperweer wott öpper meh / körperlechs / plötzlech gsehsch wär d wörter het / wenn der köter schpöter gsehsch / weisch es schlot 32 / mill vom neue chies / we mer uuschnuufe geits de flöige mies / us errötete pupille beöige sie üüs / fräset nume whiskas mir tröime vo müüs / chouf üsi platte u fröi di für üüs / röidigi grüess vom köter mit emne kater / si söigetier mit füess und längem adem / drüümal chasch de rate / mir im cadillac die blauen im chaschtewage / lex de töifer abe / näbe d titanic mir bligge wiit / hei gälberi zähn als es vom schigge git / ldeep downsyndrom und dir wippet mit // **r** // bidrmaa: weni weni rhyme de möchti meischtens meh / u weni weni style gseh verseit jedes brämssystem / wemer party wei de bängets extrem / meischtens fridlech wiu mer ke gängschter si / längts dr hie? hesch ä schibe isch ds fänschter z'dick? ä schturmi fige un äs hängergnick? de meinsch ni mi / weisch es isch dr bidrmaa / wäng geng gärn wo beschriftet si / ja vrkiff dis weed i weis no wär i bi / di angere mache party / drwile scharten i / vo vorne / fahrts dr ii? potz blitz hie si norme / für mittulosi löse immer no mittu für dini sorge / we de füre geisch chasch o hingere ga / läng dünn u bidrmaa / drum bring dir dises da / früecher cadillac niemaus jeep niemaus wacke rap für mini peeps // **r** // mot: lue mau du zitterisch ja / wi eschpeloub u meinsch es gwitter sig da / du sou geisch a lesbeshows wede wosch titte haa / u no vor mitternacht beändisch dini freizit / bedrängsch ladies uf z'leide - hesch äch e mangu a eiwiss / dys glafer trifft nume teilwys gnue / seil hani gnue um mi abezla über dys mu / e müedere schue geit haut weniger wit / am üebe si gnue aber i gseh nume wenigi hits / u bi dene wos sitzt scheid d'musig im vordergrund / une fernsehclip produziert no lang ke ohrewurm / vrschteisch / es geit nid um das wo du weisch / sondern um das wo du gsesch / s'isch d'mängi wo kreischt / du hesch mängisch wine fläsche im geischt / vrsändisch änglisch tegschte wo leider kene vrschteit / yo di szene di geit / immer meh wäg vor muetersprach / ds tuetmr leid wöu dert läg no e huufe brach //

**säget U** // mi namen u.r.s. p.o.p. / wettsch de no meh ghören u gseh / singet mit gören u reh / bitte keni schtörige meh / mir verschönere d nächt / zwüsche föhren u äscht / betöre der räscht / röhre bis tätscht / meinen i ghöre nid rächt / we der blöd der blöder verrätscht / blödheit git blöterlii - nötig ischs nii / hets föten im schpiil, löte si z viil / lötsen ids ziel aber off contest / los zersch o we de d gwohnet hesch so söttis nid sii / heb dini pföte nid drii i mini kreise weisch dass ii e laser bi / brönne schneise drii steezen ii entiisen ii ds pack / mini riime si iisen im füür wode vilech, aber nume vilech uufschnappsch // **säget U** / **wüll i bi u nätt** / **säget R** / **är isch o u nätt** / **säget S** / **äs isch o ganz es gfröits** / **mir kicke dä shit u bringene neu** // i schwöre ders hey / das i immer d wahret gseit haa / wär scheid da der überleit maa, nei / gsehsch mer das aa das i wenig verschtah / vo däm woni uuselaa, macht nüüt / d lüüt reden eh nume no shit hüt / drum macheni mit u lächle / schtibitze dir nächär der fächer u rächne der vor / was de verpasst hesch / schpass hesch - derbii gwüss kene / was de? - hätt i gwüss wele typ der passt / hätt ii - viilech ehner glehrt schpile / u dert druuf zile wo me mues druuf zile / mit pokerface gloub mer eis loufsch im kreis / bis di unger dis plache leisch wo sachen u seich / chlii schiine wo no gross si gsii wi gseit / mir wohnena dere schtrass wo abegeit // **säget U** / **wüll i chumen ungefüre** / **säget R** / **raschple dis hirni düre** / **säget S** / **wen i reden isch es sinnemäss** / **mir lige zrüg und finge das lässig** // i hinke sit i übere gil hates beat gschtolperet bi / baby weni bebne holperets chlii / ebne di ii rede der meh oder weniger der drii / ig der illest - hueschte di rote fäde wo der wägwiser sii / der sickest - vom tod zum läbe sachteki di aa mit däm flow / der baddest - bim bade chasch mer vertroue / bim abegah lani nid los / ungergaa ma ni nid gross / zieh mi uusen am egete zopf / la ne nid la rolle mi chopf / i bruche ke frou zum schtähle vo ross / was bildisch der ii / i schtile schtute wilderi besser bildeti / schiebe de wider e rühigeri chugle / vor lache chasch di mit mir / es git numen

eis: mitmachen oder uusschtige / weni negu i di blues tribe - luschtig, hä? // **r** // L.D.P. lehre di de verchere was eh / scho verchert isch verehrti / gsehn i di dert wi de schtetig / settigi bewegige machsch / fühleni mi weniger flach / gimmer gimmer gimmer gimmer no meh / bis is flimmere gseh / schimmeret der see / sim simmere wi tee / empfihle der schlee / schpilsch d sunne schpil i der schnee / hesch gwunne de schmilzen i eh / i nime di höch / i mache di high / wen i die sache verträi / mach i wi rai / musig wo für tapes gmacht isch / nid für di nachttisch du lachsch mi / uus oder aa cruissch wie missy muse vergiss i derbi / bis bluuse verrisse sii dr aabe vertaa / mir blibe tagelang da / due z fänschter zue, lue es ragnet was es abemaa // **r** //

**wasischloos?** // yo wend mi gsehch dür d'schtadt loufe u mini häng bewege weisch das i überlege was i no ha wöue rede / nie hauboutomatisch i üebe nid im schlegle u wenn du schlau u parat bisch / de schlasch nid dri / wenn i am schnure bi / si mini takes bluetjung / mis mike ä bluethung / i säge ›mike biss‹ / ke wuet jungs / wenn ds mic los rennt de renn i hingerhär / wi wes ds kabu d'leine i mine finger wär / fingsches schwär mir z'fouge? wiu i ke gloube vorussetze / keni masse wot ufhetze oder füerer si / wo häre füerts di ? das loch ir wang mues ä tür si auso gschpür mi / beweg di / süsch tuets mer sehr leid / usere stüue minderheit wird schnäu ä mehrheit / di schwigendi / us däm grund tribi di mit meh text / u möchtegärn ärnschti kurieren i wi fedex / auso gses jetz / wis usehunnt wennt immer me wetsch / wichtig isch das mer fridlech si u das z fescht fägt drum frag mi nid was los isch / wede hie feschtchläbsch.. frag mi nid was los isch .. // **du fragsch mi - was isch los / was de hä / was los isch?** // greis: allei ire zäue zeigt sech di eigene wiue / du wosch use u muesch ussag verweigere wiu dini schud sech nid usem bullebricht ergit / auso fing di wider bevor di dr richter figgt / juschtiz isch äbe nid so win är se wott / auso lueg am läbe id's oug aus wärs ä cop / vili wärde gross / mit de värse vo diverse götter / ernähre sech vo lääre wort / u stärke spöter / lige i dr ärde tod / imne ideau nid emau a d'färse cho / u loufe über d'brügge zimlech ratlos / d'schubblade mit de mässer i dr chuchi isch nid abgeschlosse / was isch los mann / schad bisch däne / schatteschtärn / wär hett di gröschti klappe z'bärn / bidr greis / nüt wärt ufem arbeitsmärt / de haut di färn / du losisch du ghörsch nid gärn / jede mönsch läbt allei / chasch nüt mitteile / wotsch vo dir verzeue finges d'lütt nid geil / auso konzentrier di ufe rhythmikteil wenn d'lütt nicke i eire eidütigkeit / mi seit dr boom i usem bärner rap sig periodisch / verchouf nid am bäär sini hut bevor er tod isch / los mau modi logisch fingsch du hiphop modisch / doch d'frag isch öb d'näär weisch was los isch nur wiu ds'losisch.. // **r** // bidrmaa: sisch afe chaut muesch mau heize hie / bruche gwaut nie / luege di a / wi geits de dir? wiu du weisch es nid / scharf wi ne peitschehieb / bisch nume aschtändig hesch äs meitschi drbi / nachbar ghörsch das das isch mi alag / u närvsch di übere pegu hei mer nid dr gliich massstab / äs soundmassiv bruchen i weni wott abga / lami sii u los mau zue was i dir vorschlaa: das isch mis nachtläbe mache ke schlacht i räppe / wi bim outomat bi mir chasch abhabe / dr dümmer blibt stah muesch nie vrgässe läng dünn u bidrmaa ke vrbrächerfrässe / machs wi bir prüefig gibe nid ab / gibe nid uf / o bi dr begrüessig blibi im takt blibi im groove / weisch was i müessti / lusbueb / pass uf gwaut cha nüt sii vo däm ha ni scho lang gnue //

**fax** // du heschmr dr ermu inegno u itz ligi näbe dir / so wi dr ärmukanau wo sech ribt ar normandie / e melodie erzügt wener ufe strand schwappt / yes lady / di nacht hesch mi uf vordermaa bracht / bi aune flüss vo dr vojvodina / i gloub i ha / scho lang nüm settigi gnüss mitemne modi gha / ds gloubi nid zu was für höheflüg mi animiersch / itz trou i mi plötzlech höher aus e gleitschirm über fiesch / we d'ufmr ligsch / wi dr thunersee wo i ds uferlose / stigt mit au de überschwemmige wos de git / los dä hit / ds lied liebkost nume di / i bi i dym ohr für ds i cha geborge si / no em morge druf am z'morgetisch weni d'ouge uftue / weisi geng no wär d'bisch u fröi mi uf di groove / du tueschmi drus u machsch mi wunschlos / lue mi gruess u kuss per fax itz hoffi nume no du chunnsch bloss // **wo bisch du? / baby schicke dir e fax yo / damit de chunnsch / hoffe s'isch nid für d'chatz nei / es wär mi wunsch / ds de ds lied hie ghörsch / u när de chunnsch** // i summe nätt u kicke freestyles i di summernacht / chummer nid mit penne da gäbtis angers womer chummer macht / ds wär ja glacht / bi nachtaktiv wine bisam / bis am morge fröh pflegenis zu mim sound / ds isch mini wau / i funktioniere analog u nid digitau / ticke nid nach dr uhr u achte nie uf liechtsgnau / es miech mi glücklech du chiemsch mau / du vrblasisch mi / wi d'winde usem kientau / la mi a di / sit i di kenne mani di chami nid / guet vo dir trenne wöu i penne schlächt alei / we dr winter chunnt / us arschhaut wird im hintergrund / schriisseni ä schtei we sie nid chunnt / rubbleni mr d'finger wund / am faxgrät schribeni de schlimme schund / wöu wär nach

sex späht kennt ke innere hung / s'git geng e guete grund binang z'sy / itz hoffi schwär du chunnsch und ziehsch nid no dr schwanz i // **r** // i ha ne guetschyn für d'honeymoonsuite im palace / dr passepartout für ds penthouse im tour montparnasse / drum lader das / mau uf dr zunge vrgah / für sone jungbrunne wi für di fani vo ungen aa / aber i chaders nid beschribe nei / wini lide nelel / blibe dehei u rouche mini fige zu brei / de tiggli nümme richtig / wine uhr wo isch a bode gheit / mängisch isch haut figge wichtig und geborgeheit / di droge geit mir dür glider u glänck / bismr wider ushänkt u di fax dir de mys schribe schänkt / he yo i flippe mit mym slang / u pumpe up da heartbeat du weisch i ha di gärn //

**muse** // hesch ds'gfüeu du gsehsch mi, nei du gsesch mi nid / rouk no nes gresi u lo mi lo sii / nume parodie / ohni flou und ohni jedi eier / kreisisch um e beat wine belämmerte lämmergeier / dini riime hei mr o scho gseh, schtinkt wi uf em wc / kopiert abschribe und ohni jede junk / i bin e hiphop junkie und e schtroossepunk punkt / cha se nid verschoo, die breite hose uusruefszeiche / aui hose si die weiche / du bleichsicht us dr obere mittuschicht / hesch zwar gäud wie höi, doch vrschteisch nid mini nachricht / i bi nid süess und nätt wie d'guetnachtsgschicht / sondern i bäue und stinke wi ne röidige köter / drum stang mr nid im wäg schüsch wird i no zum mörder / du luschtötter us em späte mittuauter / jede cop zaut er jedi huere chouft er / tramplet aui nider macht dr beat kaputt / gang furt / i bi lut und nid liisli / mach dis mu uf, wenn wotsch bi üs drbisii // **d schtrooss isch mini muse wüu d schtrooss isch ächt / gang usem huus usen und weis nid rächt / dealers gamblers schöni frauen u ching / ja numen uf der schtrooss chunnt mir der riim i sinn** // eieiei, was isch de das für ne schweineri / rouksch so viu gras, s wär no einerlei / wärsch nid schtändig depro du psycho / frissisch spaghetti ohni sugo / hocksch i dr chuchi und zausch nid emou d'mieti / jede seit vo dir du sigsch e nieti / chasch nüt, wotsch nüt, darfsch nüt mache / drum hocksch äbe hie und tuesch non en ofe bache / numen en schwache, seit er u rüschtet e dosis das es nume famos isch / da wirsch scho bekifft wenn i joint inne blosisch / paffe e schriis odr zwe, chopf chläbt wie eiter / säge: scho guet, i gangen es huus wiiter / dusse uf der strooss wird mi chopf scho viu klarer / gabet de räpper d'luft und d'huuswäng de graffitimaler / gäbet de b-boys dr bode am räscht gäbet d'musig / hiphop rockt die stadt no im jhr 3000 // **r** // mänge zückt dr mittufinger u das immer / macht drmit ds läbe uf dr strooss no viu schlimmer / u aui angere wei, das ds trottoir gschlückt isch wie dehei, u zwinge mit de bulle jede siffer i d'chnöi / jede lade nöi renoviert und ohni läbe / has gärn wen dr farbdampf tuet d'huuswäng inäble / has gärn wenn d'lüüt uf dr strooss si / ganzi famili inklusive grosi / u wen dr sigi luut uf dr gass schreit / und drmit si hass u o si blues zeigt / ja das uf d'schtrooss treit wo di vo inne bewegt / ja hätte mer ke schtrooss wär mer scho lang vrreckt / drum reschpächt vor dene ohni huus und hof / si läbe diräkt uf em bode vo der strooss / d'schtrooss dr urschprung vo jeder gschicht / und das isch dr grund wiso d'schtrooss mini muuse isch // **r** //

**kriminaufau** // a dr chramgass sibenezwängz hetme eine a sym dachgibu erhängt / gfunge mitem blick gäge himu glänkt / nid a bode wome itz au di tschugger gseht / d'schpuresicherig / komissar schteit ono dert / s'isch schono gschört seit dä wi schnäu me hüttzutag / wird tödt geit när zum nachbar u nimmt dise i ds vrhör / zytvrerschleiss / da chunnt dr arzt u het e läsig d'vrwäsigg heig scho ygsetzt im gägesatz zu dr lych vo chäsitz / wo ja guet abghanget sigi denn ir tiefchüeltruh / hingäge hie / e penetrante mief im ruum / isch dr chief im huus? / doch dä zückt sy tabak / u roukt easy none pfyffe druf u gseht drbi uus / wi dr sherlock vo de homies / u jedem tougenichts wone so gsiech däm giengs nächer soumies / indizie keni motiv unklar / i tippe uf säubschtmord / seit eine mitem schnurrbart / u was isch de das da da / das graslager da / meinsch de het ds weed aues säuber chönne uselah / nada / da isch eine da gsi zur tatzyt / het am schrick zoge / und gwartet bises aziht / dr drahtzieher schpaziert immer no em dalmaziquai entlang / dsch mis fazit / u ersch dr aafang / är richtet dr huet / luegt ds dr faut sitzt u seit nun guet / gnue gwaut itz / und dä lusueb / wo das bosget het dä mues schnuerschtracks i d'chischte / usduur bi dr sach lüt / itz ab uf d'pischte // **erklärmr mau u schteu dr vor es wär dr fau / fändisch di a sire schteu u wärisch nümme da wägemne dumme zuefau / e schrick ume haus drum lue mau / ds ds'läbe chasch gniesse mit auem drum u dra** // ja itz weisi mi heisi mi scho fasch ar angle kreise um mi / wi geier u wei dasi hange i cha nid anders / aus z'erkläre was isch gscheh / e sone wahnidee / het di type packt und itz hani d'bescherig he / si rede vomne racheakt unger crews / und ig heig die sach gmacht und no meh so gugus / säg us sägesi mir sie chönne mir dr wind us de sägu nä weni nid sägi woni denn sig gsi / okay jungs / dir weit mis alibi / i bi denn chill deheim bi mire family / doch

ds längtne nid si bedränge mi vollumfänglech uszsäge ds ig dr hänker sig / aber si schänki mir / de schono zuchthuus uf bewährig / heigi für di ugfundne suchtmittu e erklärig / zersch hani dänkt i servieri dene es märli / irgend sone story wo scho nes paar jährlä här syg / aber ds wär gfährlech gsi u zimlech riskant / wöu ig gwüsst ha das di type schpitz si uf mi skalp / drum hani nid z'chaub gmacht wöu ig di haub nacht / haub nackt bi ine in u-haft ha vrbracht // **erklärmau u schteu dr vor es wär dr fau / fändisch di a mire schteu imne / bländende schtrau / aus gangbanger erschtr wau / vrdächtiget vo dr kriminaupolizei i däm iiängende tau** // i schteue ds klar datebanke würke mängisch fatau / sie sueche dr tatort ab u de längtne es haar / dsch kes määrlä vom urs / ds entspricht de facts / wär brucht no e kurs in sache bullepresänz / u überwachig / jedi vo dine bewegige wird gschpicheret solang du wach bisch und du lachisch no / fasch e chli so / aus gieng dr aus am arsch vrbi / fahrmer us weisch i la nid los / chani doch / bis itz no tribe was i wott / schribe aus mot über dä shit wo üs vilech no droht / s'isch mr e dorn im oug und i fingeds z'viu / wehr di für dini rächt wöu das hie isch kes schpiu //

**zeiche vor zit** // du weisch i schtah uf di u ha dr bode mit em fuess nimm troffe / mir lafere vii / wahrschinlech gnuet gsoffe / müesst i zahle für di hätt i ä buess offe / aber verla di nid uf mi wiu süsch muesch hoffe / verlade wi ni bi / vom fluech troffe / kenn i di nid / blibsch wi nes buech gschlosse / du seisch i redi zfiu / sigi usgchochet / i heigi zweni stiu / u verträg broche wine verdammte vampir / ir nacht wach i wott nid schtöre / du ghörsch nie ganz mir / aber wirsch no vomer ghöre / jedi türe öffnisch du mit dire art auso gang doch du füre und schpiu du dr hauptpart i däre comedy und i erkläre dir werum mir nie hei wöue zäme sii / mit däre formulierig lähm i di / aber du redsch schtändig vo familie u fragsch was i so verdieni das verdieni ni / wot lieber nume ä liebe si auso lamer mini luune mi schmärz de chöi mer stuune / sisch ke scherz / i weiss du hesch mi gärn und umgekehrt / es git nid vii regle s'isch zit wo lehrt // **es isch es zeiche vor zit / was für bereiche das git / mir zwöi erreiches no nid / i weis du weisch es vilicht / es git verschideni gleis / aber d'weiche si mir / du machsch di uf ene reis / aber i blibe hie / i vrschwiges nid nei / lieber redeni schit liebi gits nid elei / aber niemer macht mit / leider verleidischer nid / gangeni z'wit? weis nimm wär i bi es isch es zeiche vor zit** // du redsch vo chrieg u politik? auso los mau da i säg dr nume mi name isch bider u nid bodemaa / sprachlechi absatztricks / lue wi ni z'bode ga / seisch i sigi glatt u chic / schad ha ni hode dra süsch wäri dini beschti kollegin / mir würde feschte meh wär mit mir nid drinn aber jetz luegsch dri aus würd i spinne ja erwartisch das i chäre us em dräck zieh / hesch z'gfüeu chönnsch öppis gwinne da? wart nid ufne hauptpriis / s'wär priiv gloubtisch a märli wo säge das i ä sou bi / logisch berchunnsch roti ouge vom gränne / verzeusch nächer ume du chönnsch mir nid länge / es längt mer doch wen i dr bidr bi dir bi / i mues nid ständig vo dir ghöre du liebisch mi / nid das s'mer glich wär wiu i umschwärme di / aber bitte verstah mi möchte ja gärn geng nöcher si / aber weni ä periode ha wo ni mues dises u jenes erledige de pflegen i mi mit däm das i när wider cha predige vo liebi u verständnis / auso häb mi gärn das längt mir // **r** // bi vilech vom stutz här nid vo inträsse aber ha dir schutz gä u di nie vergässe auso bitte la dr verputz wäg i mine arme wede chaut hesch u bhaut die vorwürf s'brucht ke gwaut meh i ha gschaute wos söu düregaa mit dir und em bidrmaa we mir so lige da u rede gschider würde schwiige wiu i verla mi uf d'schprach wes öppis z'säge git u verlange nüt aber au rappe mit / drum sitz nid uf mim schtägetritt we d'wotsch ga / wott nume guets vo dir i mire erinnerig ha / nimm au dini sache mit u la mer nüüt da / nume wenn d würklech öppis bruchsch lüütsch a // **r** //

**grips** // -32h: es git e fiine ungerschiid zwüsche theorie und realität / in theorie bin i do in realität vii zspät / a ma wo sech nährt wie d'hefe im bier gährt / was scho lang do isch no lang nid bewährt / sini haubwärtziit vrjährt drum lo die merde / was itz schtoub isch het me aus könig vrehrt / u dise ma vo de froue begehrt / isch schnäu vom chräbs vrzeht / u wäg si de / si huus und herd / was er bsässe het vrschacheret / e pflueg isch nid das wo dr bode acherert / u we me beachtet ds das wo mr mache / vrloore geit wi dr schau vom lache / vrlore geit so wi föid u leid / de bin ig dä wo siis züg jetz u hüt seiit / ischteit drfür o ir zuekunft / wiu nume dä wo losgeit de o mou achunt / jedi stund sig si no so schön isch schnäu vrgange / und dä wo du bisch gsi isch baud en angre / ir ziit bisch de gfange wi ire wäue ohni antenne / wo losgeit / u mr dr ursprung nid kenne / kene cha zrüggo zrüg a afang / mir schwümme wie triibhouz im höche wäuegang / es hus ohni iigang mues jede blibe / wo nid zwüsche hass und liebi cha sible // **i han es outo e wohnig und e goudige ring / hey hesch du ziit öpis azfoo u chlei**

**grips im gring? / i wott pischtole gäud froue u ruhm / wenn nid öppis gisch de  
 bhunsch das chum / i bi beliebt u bekannt ir ganze stadt / ja säg mer mau  
 hesch nid aui fausche fründe satt? / i wott läbe eifach läbe mis ganze läbe lang  
 / hey nüt drgäge doch mach mou e afang // royal: i bhaute sibe sinne zäme wine cowboy  
 d'härde / wiu si liecht aus nüüt verschwinde, scho im kreis au für immer schtärbe / ä momänt  
 aus ziitpunkt zeigt dr züästang uf dr ärde / schwär z'gseh für nes chiing wo möglechtscht schnäu  
 wett gross wärde / keni beschwärde wiu gfährde cha's üs schiins nid / weisch ds geschter, hüüt  
 u morn i eim einzige team si / 3 faktore im zämehang wo bim mönsch ä gschicht schriibt /  
 wohär ds chuunsch, wo d'bisch u wo dä wosch ds di no häretribt / äs isch natur, ds wandu i  
 kere epoche fäut / o so zergheit am archäolog sis skelett zu chnochemäu / wäu z'poche vom  
 puls – aus metronom / wetsch lieber guld u chrom? / aus grabräuber am pharao in gizeh's stück  
 vo sirä unändlechkeit roube / dank dra! keni vo dine handlige bliibt ohni fouge / mir hingerlö  
 schpure wi louge / chasch di gröschte monumänt erschaffe / u si wärde mau aus sand verstoube  
 / gloube dra isch d'chraft wo tribt wi im motor dr choube / yo! ig haute nüüt vo regle wenn's mi  
 dünkt ds si nid touge / ä ougeblick entscheidet wär dr platz uf beidne bei verlaat / oder für  
 immer uf dr strecki lige bliibt / bim duell am high noon / s'isch dr roy z'bsuech aus taifun / mir  
 stäche grad dür schranke wiu ke zuun cha wiue bräche / zu däm z'stah woni säge isch äs  
 ziitlooses verschpräche / wett immer ir laag si liebi vo hass z'trenne winä räche / d'essänz vom  
 thema: äs isch aues ä kreislouf / was nid heisst ds me uf dr eigne schpur im kreis louft / ds aus  
 wo wahrheit isch bis i d'ewigkeit widerchehrt / yo, mir hei üs scho mau gseh, u mir gseh üs  
 wieder dert / wort druuf! für aui lüüt wo öppis z'säge hei / schtiu u luutlos? hey, mir zeige dr  
 z'gägeteil / mir räppe geil bis üsi botschaft ume globus schwirrt / wiu bim tod nume d'zunge  
 aber nie ds gseite schtirbt // **r** // -32h: wedr mischrächnig no choschte u nutze / d'analyse loht  
 grüesse abr mir tüe se schtutze / ds läbe viu z'churz um wie bim schachspiu z'berächne / drum  
 tüe die ächten mc's sech räche / nüt i dr täsche aber gring vou mit viu / das isch no nid ds ziu  
 das isch ersch ds aaschpiu / lehre übr ds läbe rede äbe wi chliini ching / nähmes liecht - wi  
 d'sunne im früelig schiint //**

**i darf das** // urs pop: chumen usen us der phönix schtellig / finge das e schöni schtellig / was  
 o no schön isch verzell ig / nid schön isch mi tellie / nid schön isch mis cellie / wüll cellies si eh  
 nideso schön / schön isch die wo weli / weli haarfarb het / die wo sech uf weli - weli art bewegt  
 / die wo kurve wi ne carfahrt het / das isch arg arg fett / mini riime si dürftig i darf das / mini  
 kollege si breit wi ne fahrschtrass / mini verlegerin heiss wi blases glas / u geisch uf holz - de  
 knarrt das / i gseh nid alt uus bis i e bart haa / blibe fett bis i zum lard gah / choche di weich wi  
 verchocheti pasta / i griife zu und der köter fasst aa // **mir hei der cash und mir rugle ne /  
 mir hei der spliff u mir suge ne / mir hei der wagen und mir fugene / mir hei d  
 bude zum d ladies uf d buden ufe näh** // -32h: i bringe näbu i text, du chunsch zersch un  
 i zletscht / ha no ke regle verletzt, aber d'mässer si gwetzt / drum säg mr was wetsch und i  
 mache dr tescht / öb de dr text o zletscht no i de finger hesch / drum tue nid so krass, s'isch  
 nume höchi u bass / i bi dr bode zum fass, eh du lo doch de spass / drink nones glas, u vrgiss  
 au de hass / u de lachs so viu do machsch dr d'hose nass / wüll bi irgendeim ding, geits mer  
 nid usem gring / öb i söu schlimm oder gad ganz schlimm / do isch dr wurm drin bevor i sinn  
 fing / mini tate verrate i rede ohni gwinn / u de frogsch mi wär bringt das erdeschwär / was söu  
 das gchär mir luege de när / suf zersch mou läär süsch wird d'lag prekär / kötr u pop si no lang  
 nid vrjährt // **r** // urs pop: wär het der schlüssel zu der lösing / heschde de d losig i dire /  
 botanisiertrummele / i mim boot hani numen e / notfall nummere / chasch der code mal umegäh /  
 chräbs zrüg wi hummer häh / mir singe dä song und mir summe ne / hm hm hmhm hm hm / we  
 mer zilen uugumele / boomaye! düre schtruuch trummele / fuuchsch ume hä? / lue mal dä! s  
 ligt ume muesch es nume näh / wappeschiibli wanderpokäl? i bechumesä / i bi scho ging im  
 pingpong klub gsii / uufschössig wi ds glucksi / we d bombe chunnt de dück di / wüll i wi d  
 ziitig unger druck bi / no tage schpeter zuckt sii / i zucken o no, du verrückt! / wi yoko ono uus  
 em truckli / im kimono mit uusbuchtig / schtigen o no i die schlucht drii / mir rocke das huus  
 und zwar wuchtig // **r** // -32h: wenn si umegeit nüt gfährlechens / wo si äbe isch do äbe gseh  
 mer es / chlises hösli u fasch gar nüt drum / si waggelet das fädle u si weis werum / si zeigt was  
 si het i jedem schuppen aa / u het um sich ume scho jede maa gha / isch haut äbe schön wi vili  
 angrü ou / wiu si läbe la vida loca / i ha gli mou ke / bluete meh im chopf / und me gseht / si weis  
 das o / ribt ihre buch a mi buch / i gloub i säges no mou / i ha gli mou ke / bluete meh im chopf /  
 und meh gseht / si weis das ou / i machen aus für di / zeig mir doch diis fädle / baby / ou i wot  
 no meh gseh / wiu du chasch no viu meh / gib was de hesch / vom fä-dä-dä-dä-li //

**sympathy** // i fälle schportplatzwiis schtämm usen us dim / vokabular, usem amazonas machen tabula / di turm vo babu grabi aa / vo simbel bis nach abu dubb i was i dubbe chaa / wottsch e chnoche? i han es gnagi und i nage draa / wosch suppe? chasch mini vier buechschtabe haa / i bringe der z liecht promethisch / we de brot wettisch mi fetisch / cholen uus em füür woni bracht ha fachs aa / wie tuusig sunne züntets d nacht aa / male zeichen a dis dach draa / em tüüfu abem chare gheit? a-a / vo sälber gschprunge / gang uf d siite u mach mal platz da // **i hinke dür di huusiigang / zwinkere der zue und du luegsch lang / wär isch das gsii? i bitte di / häb e chli sympathie für mii / u frag mi nid ging wär i bi** // u we de denn im schwäfelbad scheisch / wetsch nid nume huut u chnoche sii bluet u fleisch / was hesch vo mire mueter gseit? / du wo ds fueter treisch für maden u würm / la de das gschtürm i bade die sürmle im pech im lodernde füür / u sorge derfür dass de ds modere gschpürsch / wird di body de dürr? lue mi darm aa / la mal der alarm aa / u la mal di scharm la schpile / der schiin vom schatten isch grünen / i ha vile / desch sicher wi ds amen ir chile / was fanget der aa? / wo hanget der draa? / lue i hangen ar bar / der herr hanget am gartehaag / u wartet uufe tag wo der bart laa la gaa // **r** // ig als gentleman wo men erkennt a däm / das er forme het, nid gäge d norme redt / me nie mit dene gschorne gseht wo brüele / nüele nid im trüebe für das gits üsi büebe / die houe der de scho eis überd rüebe / ig übe mi im überblick / weni tanks übere rubikon übereschick / em zar ds gnick brich em pilatus e bricht schick / berichtigt gschichtsschriibig verbrich / was wichtig isch verflucht i tief drii id mischtbiigi / dür jedi schicht schtiig i / vo obe gäg abe bis es chalt wird / vergiss ds paradies i bringe vertriibig / verpflichtisch dii? de ungerschriib hie //

**dope liga** // bidrmaa: wo wirsch du dini sorge los? schteu di mi vor aus drogeboss / wosch es bier? i ha bischpiuswis scho d dose off / houptsach ä finanzielli overdose / wohär dr cash chunnt? äh... i bi ou uf froue us / ja lue mi a / i ha nes swimming pool und ä villa / im summer schneemaa / bärge wiiss / supermega / warum uf d'gass? bi mir chaschs bequem ha / jetzt mau rue da uf de biuige plätz / rede ni vo dope ghöri nume wuiigi sätz i schtiue di schmärz / i ha ke witz gmacht hie bischte nid lätz / aber jede gascht ohni schtutz blitzt ab u jedi dritt nacht geisch mit mir abe wines schiffswrack / mit stoff überzüg i dii / jede brütigam und jedi brut überschütteni mit jegleche ware geit ä zahlig ii / d'regle si klar / s'isch nüt per izahligsschiin / mir wei dr suber deal / öii muskle stählet dir uf mis empfäle hi / bi mir im campingschtueu s'längt! gib rue / gib nid di sänf drzue wen i di uf sändig tue / hesch vilech scho dis änd im muu // **ke tag me ohni schmärzmittu / mir hei no meh vo däm scheiss doch wär gits us / wär git uf / ke tag me ohni schmärzmittu / mir hei no meh vo däm scheiss / doch wär gits us / wär git uf / ke tag me ohni schmärze** // krust: i weiss es scho aus isch bitter u fruscht / los wosch wider ä push / los dr bidr u krust / vilech bisch bi nis aglangt em sueche nach sigis / s'isch wi >nix bimer< aber rat mau wäm dä weed isch / no meh im grauhouz im versteck / schwarzi zahle füue grauzone im gsetz / mit homes wo üs decke / müsse nüt verstüüre / spure verwüschene i / ir zwüschezit / nach paar zwüschezüg überzüg vo däm frische züg / hey scheissbülle / mir wüsse vo nüt hei z' wüsse vo hütt im outo und dr schlüssu scho gschlückt / und legau probiere simer drann / heisse plan vo prive uf dr parteiliste / wei chli jede la hanf deale / aue ertrag zieht sech d'AHV ine / während priise haubiere i däm mir se diktiere / u repression geit vo grundlag zu notstand / im ne namitag mach i us dr längass es christiania / weisch du wele plan i ha? wenss glingt / cool hanibal / investiere kapital u schicke schwein ab i stall / au das gäut fäuinvestiert weme prohibiert / vilech fäut ne d'iisicht / genau so lang ischs gift // **r** // bidrmaa: jetz mau ke schtress nimm es express ä ballon épesse u la dis umeseckle la si / aber loses / mini identitäre suber wi landbuebe / i glänze wi mi schtoff und zoufrei wi strandguet / klar vermöge mers / vrhoufe nume ganz guets / lamer was vo dire strass u dire bluntgluet / a stop a jedem egge so wi z'tram a jedr hautsteu / mache z'schiine so wi d'sunne u zwar immer ganz greu / muesch nid renne: haut schnäu / gfauts dr hä? hesch gnue zaut mit fauschgäut? bhauts gäu / me ware i dr haubwäut aus es sand um pyramide hett / mache meh profit wiu mi jede depp verbiete wett / miete chasch de nüt bi mir / blibsch ä niete / ä guete rusch wünsche ni bi däm wo ni dir cha biete / heschs kapiert hä? blibsch gschidr ä liebe / lueg äm bidr nid uf d'finger weni ware umeschiebe //

**noah** // lang ischs här da het mau eine öppis afa boue / öppis wine riesespliff für MCs wo chöi floue / me hetne gfragt was söu ds gä e tüte het dise gseit / aber s'het ke papers u ke füür gha wit u breit / **u me begryft ds d'lüt hei gseit däm ma däm schpinnts** / und sie hei

d'chöpf ersch rächt gschüttlet wo dä güff du schpeter / het e lengi übercho gha vo drühundert meter / fufzig meter breiti isch garantiert wöu du de no / hinger wome zieht e kartonfiuter drii isch cho / **u me begryft ds d'lüt hei gseit däm ma däm schpinnts** / und wo sini gier isch gschiut gsi het är du no sine / söhn u syre frou u syre cru gseit löhtnechs ine / d'lüt hei sech vrsammler u gholeiet ussedra / won är hinger sire schibe d'ouge zue het ta / **u me begryft ds d'lüt hei gseit dä hasch dä schtinkt** / aber druf het's afa räppe wi no nie uf ärde / m'het ds nivo vo de flows gseh schtige und geng höher wärde //

**wätterbricht** // bidrmaa: s'isch zit für ne wätterbricht / wär rappet dicht? nid nume dir fädergwicht / häbet dir öies gsicht i wind de nimmts nech mit / träits nech gli / es isch ä geischesblitz wo nech seit das prognose sitzt u wis jetzt um d's wätter scheid / radio bidrmaa sändet die frag / öb em schnee chasch widerstah i de niderige? ds mittumass witteren i / äs gwitter isch hie / räge däne ohni skills ufem mage lige si mir / u bureregle gibi däne us / wo mit dr schnure schlegle / tüet nech bewege chömet abe müest nech nid ufregge / pegle schtige u temperatur wird höch / mir hei ä nöi zit auso lue nid geng uf d'uhr du löu / du weisch es ou so / s'isch nimm wie ou scho / jetz mache di meischte mit und ds geischtige niveau sötti gschtige si / aber d'leischtige vo morn / chöme nid vo geschtrige deppe / wiu vo vorne afa wei si nid / si hei verstigeni ziu / si meine si heige dr schtiu / u chönne scho vii / bisch no drbi? de üeb mau chli / schwirig ischs nid / ja du weisch nid wo's go hole / drum bringen i's dir // urs pop: higher als es hoch über der biskaya gsehn i di dräie wi ne läie luft / schnäll verpufft / weni bim mäihe schuft / u ds höi iibringe mues es dinne sii sitze / ermu hingerelitze hol bitze i hole de ds ganze / gseh wi'd blitze tanzen / em himu em schwerzere / sisch schwär ds säge öbs meh sere cha gää / wo d nächt verlengere wi d scheherazade / i nimen ehner es bad im räge gsehn i de grad em wätter entgä / schlieren em himu wie ggäderfäde vernäblet äbe / gsehsch nid düre oder gsehsch mi schwäbe / tief über den azoren ohni flügu nume mit den ohre / wi ne schäfliwulche gschore nächschi wuche neu gebore / die wuche verdampft bi dä wo di chuechen uufmampft / i flueche verdammt luut / es geit mer verdammt guet derbi mit oder ohni advisory / gschpües i de chnoche hütt em nami seichts e chlii // mot: zweni wätterfeschi rapper liremr d'bire vou / schwire mit ihrem vrmeintleche flou u meine drbi no / si chönni so e teil vom ganze sy / ds heimer doch scho / gha vo hip hop ohni phantasie / tanz echli / u lami please mit dym bla bla gschyss / belangloses gschwätz git platzvrwys mäenge nütts us / u macht vii chies / haute nid dr latz rach isch süess / i rackere mi nid ab für mageri müüs / i schicke drs physisch winis meine / u du schnidsch dr ds wort / mit dr sägese ab sitzisch deheime / wine frösch im glas / für ds d'schimmig stigt röschtisch gras / ghörsch o zum indoorgermanische schtamm / mann la di vo däm / nid z'fescht la benäble / süsch redsch am jam schtändig nume no vo schnäble / u pussis u vaginas u tussis u dire schtamina / schtussnisch wi eine wo ke schritt ohni sys mami macht // -32h: chas nid ha, wenn dr räge uf mi chopf prasslet / drum hocken ig im jeep u dräihe dr aalasser / dusse wasser, dinne meh sound aus gmüetlecheit / göht furt vo hie, ja wenn drs gmüetlech weit / agseit isch lärm und o no ohreweh / und weder raclette no vervenetee / meh musig gits, wens schneit und haglet / vom obe spoot bis das es taget / feschtgnaglet, ufgno vom misch zum master / heize wi der föhn vom süden ufe zu de basler / dräie di um win e wirbuschturm / mir gö zimlech zwirblig mit diim gring um / drum pass uuf vo üsem schnuuf wirsch no wägblose / schlächti räpper gö vrlöre ir nöchschte windhose / bisch e mimose üse froscht gfrürt dr d'bletter / nume wiu'd e crew hesch bisch no lang ke räpper

**anarchie** // i läbe ds ghetto uf em zwöite bildigswäg u wett no / underground sii wid schine vo der metro / frage di wär redt no? lue das aa / du wirsch depro, nimmsch die füülnis wahr / was nüehlich da? es cha nid jeden eine vo de schtüehl haa / we sibe warm hei de mues halt eine chüehl haa / wär weis e wäg us däm gwüehl da? / jede schritt bedüet im schnitt e faux pas / pas de deux los mal mir schadene / ungerwandere wi madene / cucarachas schabene / mir si a dire schtuden am knabbere / hobbygärtner u heckeschütze verlühre beret u mütze / we mer lafere / mir si hütt em iischtah für e... eh... eh... / chläbe das zäme wi gaffertape / heiters grafft die chraft verseit / wo macht dess d sach abverheit / d chance scheid fifty-fifty, gründ si triftig / vili wo rede rede giftig / u vieles wo glänzt isch siffig / ldeep schtiftig / jede wald bruucht e lichtig // **machsche regle? mir brächesche / machsch wind? mir fächlene / schlasch chind? mir rächesche / wär gwinnt? die ächtere** // mot: ds gratet rächt liecht ines schlächts liecht wi dr torbärg / dr mot woder i ds ohr päagt dä fräch siech / wo ds angere gschlächtliebt bi scho zwäg / ha leider ke geschäftssinn für mini wort und raps / vo hie bis portugal u zrüg zum lächelnde griech / wo bächerwys anisschnaps inelaht wine läbende freak / wo d'umgäbig

vrsmiert mit sine kritzeleie / d'bürgerspitzeleie führe drzue ds är itz schwitzt deheime / scho gli gitz ihm eine wener a d'züge dankt / u dasme sine lüge ke ufmerksamkeit meh schänkt / si zieh massewys bewiismateriau us ihrem regischer / frage di wär isch dr füürleger wine kanischer / gli ghöorsch scho ds knischtere vo de äscht / si mischle di uf u du bisch dr nächscht / ringsch no chli nach luft u dir wird plötzlech ganz schlächt / gsetz si nützlich solangs sechs polizeilech nid rächt // **r** // -32h: das isch ja mässerscharf formuliert / so das es d'regle o no i d'forme biegt / beliebt, vrhasst, beschroft und vrrate / dir redet vo pischtole u meinet gueti tate / öii charte - nid gmischt u de no zinkt / luget haut - das ä fette gwinn winkt / eis bei hinkt - do mues e chare häre / mach mou füre, weit die note gschpüre / weit no meh gseh vo dem décolleté / chum bebe mach e fahrt mit em porsche / si si CEO auso VIP / liebe WTO und marx kenn'si ni / was isch anarchie / anarchie kenn'si ni / das söue höue chaote si / si säge: ohni rächt u gsetz / würde immer no ir steiziit steine gwetzt // **r** // urs pop: söll emal e narr choo dass hie öppis abgeit / lege schnell e schellechappen aa han i sen abgeit / was abschteit a mim hinderchopf isch haar / was i i dim chinderhort uufmachen? e bar / böse böse böse maa / löse das, dir bindet no / i finges lind, dir findets roh / i brichte, dir erfindet oo / i richte di nid, schichte nid ii i schublade u schtapel / wüll d brichte die si / widerschrüchlech, rat du / mal wo das häre cha ga, der lärme faht aa / dir chräihet verrat u säihet di saat, schtellet der mäihet parat / mir schüttle die form, hütt u nid morn, blüttle wie porn, nütze die norm / um se flachdslege, verschellen i der nacht d heble / die wo d macht heben usen usem takt use bewege //

**lippetriib** // -32h: i gib dr funktionau mi gägebeleg / isch es nid schreg, das es guet usechunt, we me nume nüt drgähet / was isch agseit, öppe die totali dopeheit / wo jedi läri ussag uf die nöchschti läri ussag drufhout / und am schluss di nume ds fragezeiche ihout / aui weiche mit schnäue scheiche / vo de flows wo dr köter het wird jede seechrank und mues erleiche / i nimme di nid uf d'schippe nid, wiu es isch nume en ändlose lippetriib, wo mi witterschiebt / ig, dr mot, dr bidr und dr pop pumpe di vou mit beats bis dis hätz stoppt / -- ok, gib dr d'uskopplig vo mire nöchschte single / s'isch bis jetz es jingle baud im chopf vo jedem schlingel / haut roh win es promo, doch bim promo mues jede mou afo / mou agno, fahrsch ii uf emene major label / wi dr clark gable, ds schponsoring vom schtadtweibel / jedes vrdammte fluechwort wird dr wäggschtriche / hesch diis ziu ohni wäg erreicht, das heisst ohni gschichte // **schtets am chaule / im chäuerclub ir grosse haue / am mic umesoue / doch äbe dr hiphop uf boue** // dr 32 schtung rymlitischler ritzt so wi fischers fritz / ändlose mumpitz bises sitzt / ja was hesch du schtibitzt / d'ermu ufeglitzt / du machsch d nachtschicht / wine jeger oben uf em aasitz / ja was itz wär motivierti wine arschritt / klarsicht im gägesatz zu däm wodr d'war schickt / mir bringe nahrig a jede märit / du hesch gar ke ahnig zu däm fingsch i üsem text ke erklärig / sägi pläm säge eh aui pläm pläm / drum nid nume z'bärn rühret aui d'luft i d'häng / s'isch äbe ne bänger für aui chopfnickende hänger / üsi arme reiche witer aus e wäutempfünger / üsi wäue wärfe wäue uf / mitemne rymboge so läng dases dr nume no usschnuufft zu däm groove / biissisch du dr d'fingerne ab mir setze a / mitemne länge hebu und emne fette cap denn fömer a / ke sand im getrieb vom ändlose lippetrieb / mini hang weiss nid wo dr schaft u wo dr trigger ligt / näme di nid uf d'schippe nid nei mir näme di uf ds chorn // **r** // mot: mir überlege meh / auses in norwege fjorde git / entwirre sprach wo vrzworglet isch / nid so wi dr big brother shit / nimms aus ufforderig / wort si bote dr mot bruuchtse scho zum vornheri / vili vo dene raps si ungschore drvo cho / aber die gsehni de scho no im labberlabor / morn oder so / du fingsch ds mach überhopt ke sinn / gloub du mir ldeep het bi däm taupe din / eh scho / bhaut dr swing dunge mitem shisch / mauder gschwing öppis bunts wi dr sunneschyn / sig sag suggeni am mike / überchunnsch du / vom abtanze blase wi dr slotterdike los em mot sy rhyme / hingerfotzig wi abel u kain vrkabet wi di wäut / drum lass dr tadel du schwein gömer itz on-line / oder gömer unger? / schonzyt vrbi / ldeep shisch git haut hunger // -32h: usnahmswiis mou positiv u nid oberpriiv / bin i dä wo sech um di huusegge schlicht / d'freiheit vom rede, das vrlangen i / mängisch vrsanden i im näbu vo den argument / nume äbe itz nid, houz aglängt / chume mit em schtiu u mit de schtruktüre / wo sogar am hingerletschte tüe dr blues uskuure / tümple nid im obskure, sondern chume klaar u früsch / leges mikroskopisch chlii uf e tisch / schaffe mit beobachtig und em schpiutriib / das isch eidütig e sitehib / si säge wär schpiut isch e dieb vo dr ziit / aus wo si wei isch das me ufschtigt / numen ig, ja i gangen äbe abe / u das ohni mi vo dere wäut abznable / d'müglechkeit vor würklechkeit tuet sech vergable / gloub mer was wöhr isch das isch viufäutig / u jedi beschtimig die isch zwieschpätig / wie d'chärnschpautig, s'isch gwautig / wie vii der chasch usdänke / u wie gar fescht de dir dr chopf chasch vrränke / und äbe das isch mini beschäftigung / mängisch chlei

ungung, drfür weder grad no chrumm / i bi nid äntwäder oder / schnuder oder choder /  
sondern ds einte plus ds angere / mi buuch isch vou wie dr chopf vore schwangere //